

栗香隨筆

粟香隨筆卷二

江陰 金武祥 淮生

全椒薛慰農觀察

時雨

引退後主講杭州崇文書院

旋移席金陵惜陰書院東南學者宗之余游金陵時  
與過從贈詩有官會杭帥同坡老家近滁州號醉翁  
簪纓敢詡金張族杞梓都歸薛卞門之句觀察題余  
夫容江上草堂詩稿五古一首有云掩關讀君詩語  
語出我意又云莫學醉吟翁山林樹一幟蓋規之也

余族輯有文牘觀察序之又爲題 先祖燼餘詩稿  
迄今遠企光風猶神往於秦淮鍾阜間也

吾鄉何廉昉太守

栻

有悔餘菴集各體皆工駢體尤

爲人傳誦爲余刪定詩稿且竄易數處序以駢文又  
爲 先祖序燼餘詩稿王申春杪卒于揚州余挽以  
聯云雲樹一江分長懷水部高吟詩興纔聞動梅閣  
烟花三月暮太息廣陵絕響歸魂還待主蓉城蓋江  
陰舊名芙蓉城也後至揚州有雜事詩中一絕云瓊

瑤遠寄壘猶新過訪壺園迹已陳廿四橋頭一回首  
空留明月弔詩人

武進許士詢先生

均

以老明經爲制藝宗匠余幼時

曾受業焉避亂後處境益艱常以詩詞自遣有咏燕  
詞云長天如許不知何往是君鄉土又云怕放眼門  
巷斜暉總是傷心處蓋自傷也咏懷云狂飈振林木  
巢鳥皆顛危猛火燒原蕪穴蟲盡瘡痕蟲鳥無知物  
苦不早見幾豈不早見幾舍此將何依俯仰一太息

涕泗垂交頤寶刀歌贈江陰沈梓堂云丈夫七尺身  
昂藏生當滅虜安封疆毛錐三寸不足用吳鉤越鐔  
馳鋒銳沈君昔年慕豪俠佩刀百鍊昆吾剛鑄以金  
精大冶手磨以怪石荆山岡銅環拂拭耀明月錦帶  
繚繞含雲章腰間抽出赤電掃一揮凜凜飛青霜呂  
虔顧之驚失色曹丕五寶慚無光蛟螭可斬犀可斷  
宰割豺虎如豬羊羽檄紛馳已數載文臣武將咸張  
皇胡不持此殄羣醜恢復疆土完全湯江流萬里洗

血刃寶氣沖斗橫天長白頭壯志不得展枕戈待旦  
空悲傷我來訪君恣談劇一醉往往傾千觴酒酣拂  
衣爲起舞廉頗雖老精神強噫嘻奇才利器等無用  
匣中徒使蛟龍藏

沈梓堂居士又丹居桃花港之石莊工詩善書不求  
聞達年六十餘猶贈先祖詩有白頭還擬拜明牆  
之句詩稿亂後遺失僅記其訪友一聯云一路行看  
天釀雪到門驚散雀爭梅亦吉光片羽也

屠笏巖刺史名紳又號賢書所居西貫與余居前後相望 先曾祖客窗筆記中屠氏善報一條卽紀其

先代積累之由今則式微甚矣所著有六合內外瑣

言二十卷

署黍餘裔孫編

蟬史二十卷

署磊砢山人撰

近年上海以

洋板刷印流傳頗廣洪北江詩話云屠州守紳詩如蓄沼文魚栽盆芍藥庚申亂後迄未見其詩集也余雜憶鄉居詩云州守風流憶往時忽焉舊澤鮮留遺瑣言蟬史猶傳遍不見文魚芍藥詩

北江詩話又云屠刺史紳生平好色正室至四五娶  
妾媵仍不在此數卒以此得暴疾卒余久之哭以詩  
曰閒情究累韓光政醕酒終傷魏信陵蓋傷之也

丁墅鎮鳳德隆明經名應韶有讀書瑣記刻于松江  
吳氏藝海珠塵中又鳳氏經說三卷刻于嶺南伍氏  
粵雅堂叢書中李申耆太史序云先生所居濱江村  
巷僻陋聚生徒謀精以活矻矻白首困而不戚年七  
十餘卒嘉慶之十有六年也余雜憶鄉居詩云藝海



珠塵粵雅堂經師著述未淪亡只今丁野壽高躅寂  
寞江村蘆荻荒

余雜憶鄉居詩云有時侵曉入蘭城十里烟波似鏡  
平待得匆匆催返棹到門燈火已三更蓋余居雖隸  
江陰西陲而距郡城僅十餘里辛巳孟夏日記有入  
郡紀程因附錄之以考道里之遠近焉初十日辛丑  
乘沈姓船赴郡時宿雨乍晴溪流新漲解纜里許永  
利橋余書爲泳鯉橋舊有小印曰泳鯉橋頭一釣徒

卽此水通三面兩岸極寬橋亘如虹波平似鏡鳴榔  
撒網漁舟多聚此間亦水鄉之佳處也南岸朱藤數  
十株蟠繞竹樹間紫穗方花絡索可玩西有小河爲  
南湫浜有戴君呼附舟停橈載之又里許郭庄橋沿  
河長堤堤半有小橋過橋卽入陽湖豐西鄉境犬牙  
交錯鴈齒平分此界彼疆截然不紊三里大通橋以  
木爲之有小村落夾河而居三兩茅茨午炊漸起過  
橋半里出口而南爲王興橋俗呼爲橫艇橋北達龍

虎塘是瑛港入江之路河寬深而水浩渺爲吾家入郡城半道此橋舊稱啞橋亂後僅存橋堍過此者猶戒凜金人橋東閔家村相傳爲閔子之裔其尙有孝友之風乎四里倉頭橋過橋爲青蓮墩墩南係常江往來孔道所謂北塘卽綱頭河也帆檣絡繹相屬於途此墩宛在水中有結屋其上者比之小皇甫墩自此南行遙見雉堞參差室閭比櫛三里卽抵北郊泊江陰碼頭計自吾家至郡順風張帆逆風曳繹天時

人事遲速不同若搖舫盪舟須厯一時又半洋表適  
三周也

距大岸北里許有土阜名姬山相傳爲姬光太子墓  
余前作姬山考載縣志後又有雜憶鄉居詩云句吳  
陳迹總荒涼廟貌重新考訂詳記得童時矜捷足姬  
山高處作重陽當重建姬山神廟時 家君撰碑記  
云史記封禪書論次古來用事于鬼神者秦漢之際  
郡縣遠方神祠民各自奉祀不領于祝官洎釋道之

教行而祀益紛不可紀其足以勸善懲惡使民知所  
警畏者君子勿廢焉江陰之西前周鎮有土阜隆然  
高者爲姬山或呼爲姬墩相傳爲姬光太子墓山之  
陽舊有祠宇祀關帝城隍神並列祀諸仙釋而太子  
亦像祀之爲一方祈福報賽之所庚申之亂廟悉燬  
甲子江以南蕩平閱八九年民困漸蘇乃醵錢就舊  
址草創數楹歲丁丑族弟廷貴復集鄉之人捐貲重  
建雖未能規模復舊而位置秩然庶幾無褻慢之咎

工既竣囑余爲之記考姬光太子見于載籍者凡四  
夫差嗣立爲君不得稱太子吳越春秋云齊景公壻  
爲太子波斯應與齊女葬于虞山之顛今常熟虞山  
有墓太平寰宇記云吳王第八子葬于江陰之繖墩  
今所謂珊瑚洞卽墓穴也惟左傳有太子終纍爲夫  
差兄未立而卒此當爲太子終纍墓傳之千餘年而  
不毀若有式憑之者則祀諸神而並祀太子也固宜  
而余重有感焉山距余家里許猶記少壯時值春秋

賽會每偕鄉之父老登眺以爲常猝遭變亂于流離  
瑣尾之後猶得復我邦族休養生息以重覩此廟之  
成策杖重游俯仰今昔有不知老之將至者而尤願  
鄉之人循循孝弟相友相助以成仁讓之風將見感  
召休和神降之福歲奉牲醴以答豐穰此則鳴鐘伐  
鼓之餘臬與鄉之人所共勉者也

距大岸北半里許有村名城頭相傳爲昔城垣故址  
余考寰宇記利城戰國時築一名茗溪一統志利城

鎮西南三里有子城基城壕遺址尙存今城頭村在  
利城鎮南適當其地然野逕荒蕪難尋舊迹矣余雜  
憶鄉居詩云七雄建置溯源流百雉今餘土一邱咫  
尺荒村何處問夕陽衰草古城頭

大岸東五里有碗墩山高三丈許廣輪稱是實古墓  
也故老相傳墩內瓷碗甚夥土人有吉凶大事需用  
多碗夜奉香楮虔告貸若干詰旦輒如數給之事過  
卽償一夜仍歸墩內相沿日久明季有假而不歸者



由是歆絕 先曾祖客窗筆記載之故余雜憶鄉居  
詩云一邱荒翠賸苔斑覆碗居然也似山始信搜神  
千寶記有時金盃出人間

德清戴子高茂才名望研精經史之學會文正公器  
賞之延校金陵書局余在金陵識之於劉開生觀察  
座中後往來談藝甚愜題識拙稿有天懷高曠措語  
自雋閱歷既久造詣益純之語性好潔嘗與登酒樓  
見色惡者輒嘔吐不能終席詩不多作憂旱云聞道

當陽詔恩綸首綏征頑徒何不靖白晝乃橫行困苦  
廉隅喪飢寒性命輕長吁懷賈傅誰與念蒼生元日  
云獻歲寒陰霽開春永晝晴乾坤悲浩劫江海痛遺  
氓觸處皆榛莽何由洗甲兵倒懸救無術念我亦餘  
生谿上云涼月弦初上清溪生晚烟蘆花飛不起亂  
落釣魚船史忠靖公印歌小敘云象質方徑寸文曰  
督師輔臣史可法章周侍御得諸金陵市上詩云侍  
御示我史公印肅然如見古遺烈文有督師輔臣字

審是甲申以後物淒其天步當年蹙擁立孱王事倉  
卒奄兒苗種相怒頑哀哉天使明命絕外公命公督  
四鎮遂令羣小司綸綍連章請餉不得與調護諸軍  
敝唇舌疆臣絕吭後御史駟興平死大河藩蔽崇朝失春  
燈日宴羣妖興晉陽之甲武昌出吁嗟北使不得歸  
又見戈矛生叛帥仰觀上相星獨明想見高懷徒鬱  
律當其艸檄印牘尾恨不擲化常山笏上游事急下  
流渡中原從此成顛蹙公騎箕尾歸天上此印沈羶

歷年月嗚呼滄桑已閱二百載流傳毫髮無刊缺定  
知天鑒忠藎心留與後人作表揭朱文蟠屈疑公血  
上與日星同不滅公魂應傍孝陵居夜見精靈來髣  
髴又五古如感賦云惟此冰雪心不隨紛華變上湘  
鄉相國云溫恭多威儀雅量無畔岸想見百萬軍湛  
然能持變始知武事立皆由常德建又七古如俠客  
云道旁握手名未通一笑入門便知己惜不久病卒  
且無子嗣聞與俞蔭甫太史有連當能梓其遺稿也

有人誦錢塘汪時伯題壁云一入東明境滔滔萬頃  
連人家都在水炊屋半無烟河勢奔城下舟聲過樹  
顛望洋真可嘆何處覓桑田剩有高岡地秋來旱復  
蝗一年三痛哭十戶九流亡兒爲啼飢賣人惟築堰  
忙斯民何不幸搔首問穹蒼

又誦邱履平名心坦詩忘其爲何地人戍夜云馬嘶  
殘日落萬里暮天蒼畫角江關月旌旂戍壘霜夜深  
寒鍬甲秋勁裂金瘡夢覺笳聲起驅兵向鳳陽哭劉

小松云哀鴻飛海上夜雨不堪聞旅病曾憐我歸來  
轉哭君感懷當亂世憎命到斯文驚覺山陽夢天涯  
杳斷雲

余妻叔蔣季蓮明經名純篤于內行性孤介工詩詠  
上方村薛氏二烈女云矢志全貞孝憐他姊妹花九  
原慈傍母萬里慘呼爺瀕死心如鏡遺容髻尚髻他  
年採風者記取是農家蓋女因父遠戍守貞養母賊  
將至與母皆投繯也郎先行小序云庚申之亂婦語

其夫之詞也賊至婦投水死詩云郎先行妾難隨郎  
行妾隨賊可追郎先行莫妾俟郎行賊至妾可死郎  
行妾心安賊至妾身死妾死一身何足論郎行一脈  
宗祧存嗚呼死者死矣生者生表貞揚烈胡不聞至  
今秋水年年碧常照孤墳懸夜月過京口云五更殘  
月夜鳴鉦雙槳迎風一葉輕遠戍忽聞瓜步鼓片帆  
已過潤州城漫天風雨雲無主捲地波濤雪有聲如  
此中流懷利涉幾人攬轡矢澄清野菊云秋風開近

野人廬貼地斑斑任卷舒莫厭艸茆風味淡寄人籬  
下又何如又午晴酣蝶夢春雨潤鶯聲客裡心驚新  
歲月夢中魂繞舊山河皆佳

癸酉寓白門吳晉王太守

唐林

來訪盤桓旬日見惠

詩扇並集成語爲製楹聯云忽發狂言驚四座分其  
餘事了十人余贈以詩有六代江山空攬古十年湖  
海始逢君之句出示詩稿甚富當時未及摘選茲就  
其所錄示者登之以誌離合之踪云鍾山云鍾陵高



聳扼天關虎踞龍蟠氣象閑江上諸山如拱立一時  
柱笏就朝班蔣山云蔣侯祠廟依山麓彷彿神燈擁  
百靈不用伐毛兼洗髓仙人只要骨頭青燕子磯云  
九門詆蕩石城開鎖鑰東南幾劫灰五百年來江左  
事鳳皇飛去燕飛來朱雀橋云朱雀橋邊野草黃笑  
人寂寂是元長八騶清道織兒擁有客提衡過大桁  
雨花臺云九廟同嗟血食捐袈裟誰與問枯禪兒童  
不解興亡感寒食年年放紙鳶臙支井云結綺臨春

傑閣標後庭玉樹正迢遙繁華一入焉支井從此風  
流盡六朝莫愁湖云山色湖光一覽收黃奴舊事劇  
風流南朝天子多情甚特字無愁配莫愁倉山云海  
內龍門一扇開老成凋謝悵袁隗若從詩史編人表  
此老文章屬霸才妙香菴云妙香菴裡泛荷池文謙  
王郎憶往時山上孤亭亭上月月邊尊酒酒邊詞

錢榆菴明經

煉辛

曾同寓西江已巳冬由西江將赴

皖城留別五古四首其首章云長夜何漫漫孤桐復

淒淒游氛暖中庭耿室鐙若迷獨遊苦歲晚獨立愁  
天低人生如萍蓬安得辭別離區區致親愛不在功  
與期促促抱憂傷非關寒與饑異地一盃酌與君聊  
共持願言永相勗及此芳菲時余亦賦五律二首贈  
行辛已復晤于里門榆菴方自皖歸更名無擇酷嗜  
禪學插架皆內典焚香供佛或閉戶靜坐累日不出  
其詩少作似梅村後學謫仙長吉楊花云天涯倦客  
正蹉跎又向東風策蹇騾北里香蕪餘恨滿南朝詞

筆斷腸多餞春曲苑膏騰月送遠平江浩淼波邇日  
烟雲正撩亂不堪飄泊奈花何樓頭芳樹晚昏昏萬  
點離愁落酒尊蕩子不歸桃竹路美人曾住水雲村  
長亭細雨迷行迹古苑斜陽醺夢痕知否潘郎憔悴  
意緣醺和淚禮香魂一分流水二分塵沾染游絲亦  
宿因已忍伶俜辭故土直疑淹忽誤前身珠簾繡箔  
垂何早露壘冰綃畫未真莫遣紛紛過牆去者邊正  
有倚闌人領略風情是暮烟似顛狂處自纏綿平原

拋擲曾千里小海浮沉又一年有恨漫隨塵委地無  
才空擬雪漫天五湖春水容相訪好與梨雲結淨緣  
居庸道中云靈鼇奮脊控神京天際迴峰作送迎九  
塞關河尊上谷三邊風雪撼長城夫容闕北羈臣夢  
楊柳江南少婦情七葉承平甯恃險治安今已策書  
生又落葉云荒郭月明和鴈墮寒林風緊挾泉流有  
感云瘡痍未省還鄉好潦倒先憂下第難亂後回里  
云風淒露怨殤無祀狗走雞飛婦有夫揚州雜感云

楊柳堤邊新客舫茱萸灣口舊兒家明遠燕城前代  
恨子山枯樹異鄉愁行宮鳥語芳華寂胥井蟲吟露  
氣秋

丁卯秋試後自里門赴江右與孫子成茂才

縉

同舟

沿江名勝流覽殆遍子成游興尤豪且有濟勝具凡  
陡險處皆賴扶挈以登故余贈句云自慚腳力輸君  
健扶我同登第一峯余丙子至章門任小沅中丞時  
署江藩言子成卽在幕中盖由豫偕至江也子成出

晤偕游百花洲復訪滕王閣和余七古一章頃刻立  
就又互相酬和余有試上滕王高閣望古來題句幾  
人留之句子成天真爛漫友誼尤篤離而合合而復  
離天末懷人益增悵悵

余游麻姑山詩起四句云盱江江頭十日雨夢魂夜  
夜游仙府東風吹作三日晴許我游山約遊侶時董

丙階參軍

廷賓

需次江西和韻云天風吹海海飛雨

神仙排雲出紫府長爪麻姑進酒來邀結飛瓊跨鸞

侶傅采臣學博

時亮

和韻云萬壑驚濤作風雨千載

仙雲迷洞府蒼松翠柏鬱靈奇青猿白鶴相儔侶二  
君和詩甚多惜無從記憶矣

漢仲長公理樂志論云使居有良田美宅背山臨流  
溝池環市竹木周布塲圃築前果園樹後舟車足以  
代步涉之難使令足以息四體之役養親有兼珍之  
膳妻孥無苦身之勞良朋萃止則陳酒肴以娛之嘉  
時吉日卽烹羔豚以奉之踟躕畦苑游戲平林濯清



水追涼風釣游鯉弋高鴻風于舞雩之下詠歸高堂之上安神閨房思老氏之元虛呼吸精和求至人之恍惚與達者數子論道講書俯仰二儀綜錯人物彈南風之雅操發清商之妙曲逍遙一世之上睥睨天地之間不受當時之責永保性命之期如是則可以凌霄漢出宇宙之外矣豈羨夫入帝王之門哉鍾伯敬評曰所言勝富貴之福萬倍矣亦知其必不可得而寄托之詞也余閱宋羅景綸鶴林玉露所載一節

則亦可見隱居之樂不必盡如公理所云也因並錄之唐子西詩云山靜似太古日長如小年余家深山之中每春夏之交蒼蘚盈階落花滿徑門無剝啄松影參差禽聲上下午睡初足旋汲山泉拾松枝煮茗啜之隨意讀周易國風左氏傳離騷太史公書及陶杜詩韓蘇文數篇從容步山徑撫松竹與麋犢共偃息于長林豐艸間坐弄流泉漱齒濯足旣歸竹窗下則山妻稚子作筍蕨供麥飯欣然一飽弄筆窗間

隨大小作數十字展所藏法帖筆蹟畫卷縱觀之興  
到則吟小詩或艸玉露一兩段再烹茗茗一杯出步  
溪邊解后園翁溪友問桑麻說秔稻量晴較雨探節  
數時相與劇談一餉歸而倚杖柴門之下則夕陽在  
山紫綠萬狀變幻頃刻恍可人目牛背笛聲兩兩來  
歸而月印前溪矣味子西此句可謂妙絕然識其妙  
者蓋少彼牽黃臂蒼馳獵于聲利之場者但見滾滾  
馬頭塵匆匆駒隙影耳烏知此句之妙哉人能真知

此妙則東坡所謂無事此靜坐一日是兩日若活七  
十年便是百四十所得不已多乎

丙寅余館建郡時南豐趙莘野大令

從佐

適館瀘溪

同舟旬日承贈詩有云我愧郗超頻入幕君如郭泰  
喜同舟及余庚午試白下莘野已由戊辰進士用知  
縣發江蘇爲是科房考故余和其見贈七古原韻有  
云勗哉五色慎勿迷鷲鳥累百不如鶚後出令弟在  
船孝廉遺稿徵詩爲題七律云當年樂事說天倫遺

稿重搜瀆淚痕千古文章悲浩劫一編心血護忠魂  
孝廉于丙辰秋殉難奇才定斫王郎劍逸韻猶傳伯氏墳此後  
殘篇倍珍惜長同正氣塞乾坤

己卯十月與徐挹泉侍御

文洞

自津門附輪舟而南

至滬易舟返里同泊崑山之茭葭浜侍御贈詩云茭  
葭浜外水漣漪游子停橈日暮時料得有人燒燭坐  
新吟補入草堂詩蓋余芙蓉江上草堂稿素爲所痴  
嗜也其後余返嶺南侍御入都猶往返函達論及時

事每慷慨思有所建白乃辛巳春遽以疾卒于京邸  
未竟其志詩函數紙遺墨猶新聞笛山陽可勝悽愴

金匱俞芝田大令

敦培

補江西樂平居贛州最久工

填詞有海棠紅得可人憐之句何廉昉太守以俞海  
棠呼之先和余湘江採梅詩乙亥至贛州各有投贈  
所居闢小園觴咏流連尤有豪興贈余詩稿並藝雲  
詞一卷兼工繪事有三絕之稱去歲于書肆中見所  
輯酒令叢鈔四卷雅人深致猶可想見也

廣東雷瓊道駐紮瓊山縣大堂楹聯暗藏瓊州全府  
州縣名色其句云定安全之策坐鎮瓊山開樂會以  
會同官統府州縣羣僚獨臨高位澄邁往之懷清揚  
陵水佐文昌而昌化理合萬儋崖諸牧共感恩波梁  
晉竹兩般秋雨菴載之謂其組織自然吾鄉亂後創  
建西郊書院蓋合江陰之西虞門夏港申港前周利  
城丁墅桃花後梅觀山葫橋十鄉鎮之士而課之也  
余仿作一聯暗藏十鎮名色不一字遺漏不兩字因

圖並不一句落空聯云關門幸際熙朝敎同夏校養  
比虞庠我國家利溥斯民申命尤隆選舉願今日陶  
成後進趨步前賢會見春城盛桃李築聖宏開廣廈  
橋接青山浦連黃港諸弟子周旋此地丁年共勵觀  
摩待他時花宴瓊林梅調金鼎休嗤學士畫葫蘆余  
先爲逸亭兄作一聯懸之云遺軌仰前賢碑銘季子  
浦溯春申千百年餘韻流風看氣象重新禮樂詩書  
綿舊澤育材占勝地北枕吳江南雄秦嶺十萬戶鍾



靈毓秀願英豪疊起文章事業應昌期

逸亭兄宅旁構小園壬申年余題聯云芙蓉江上占  
林泉解組歸來勝境重開摩詰畫桃李園中宴花月  
飛觴歌咏良遊愧乏惠連詩

廣州粵秀山麓有陳氏挹秀園余爲題聯云地近越  
王臺入室有秦時明月家傳太邱長登堂懷漢代高  
風又云繞郭有山白雲高妙近水得月清光大來又  
題其園門云花徑雲霞通粵秀羅門風月話山陰蓋

陳氏先代由山陰之蘿門遷居粵東也陳君繩齋有  
別業于天平街書室種梅顏曰咏花軒余題聯云閑  
門覓句懷無已索笑巡簷定有人

彭雪琴宮保攻克湖口小姑山詩云書生笑率戰船  
來江上旌旗耀日開鼓吹萬艘齊奏凱彭郎取得小  
姑回佳話奇勛獨有千古後居西湖題平湖秋月聯  
云凭闌看雲影波光最好是紅蓼花疎白蘋秋老把  
酒對瓊樓玉宇莫辜負天心月到水面風來余見宮

保聯語多矣渾脫風華當以此爲第一

余于役潮陽見署旁有黃老相公祠香火甚盛讀壁間碑乃知諱安字定公號石齋上元人崇禎末潮陽令孟公聘爲幕客甲申之變先生北望慟哭投署西偏井中死之忠義大節固宜廟食此邦後陳子厚太守持贈古井遺忠錄蓋太守令潮陽時以傳記題詞漚刻一冊也山陰汪君芙生詩云心斷寒泉古甃中流傳片碣表遺忠九京自殉先皇帝千載人呼老相

公青谿鳴咽白門遙何日魂歸大小招埋骨他鄉應  
不恨孝陵回首柏蕭蕭勝國遺踪鳳水湄扁舟訪古  
定何時傷心琢玉軒前路別有天潢小裔碑

在曹甯縣

乾隆時揚州離商某大宴賓客有遠來戚求助于商  
者亦在座行飛花令得紅字令至商云柳絮飛來一  
片紅應第三座某太史飲太史停杯問曰柳絮何以  
云紅請問上句某商囁嚅紅漲于面戚某遽答曰上  
句爲夕陽返照桃花塢宋人詩也太史乃飲是日席

終商卽贈戚三千金

昔王夢樓先生自琉球歸刻小印曰曾經滄海近時  
泰西通商輪舟之利無遠弗届 中朝使臣相望于  
道農工商賈航海者以億萬計則涉海于此日固不  
足爲奇矣高引之觀簪曾取道印度海而西歷大東  
洋海而歸刻小印曰身行九萬里繞大地一周亦足  
以豪矣中國惟東南濱海余已卯自廣州航海轉餉  
入都蓋中國濱海之區十歷八九矣故有八千里路

風波穩看盡東南海上山之句並以下句刻小印焉  
常州才媛首推莊蓮佩名盤珠有秋水軒詞一時傳  
誦逼真漱玉遺音蘇幕遮詠楊花云早抽條遲作絮  
不見花開但見花飛處繞砌縈簾剛欲住打箇盤旋  
又被風扶去野棠村芳草渡離却枝頭總是傷心路  
待趁殘春春不顧葬爾空池恨結萍無數浪淘沙病  
起云夢斷小紅樓宿雨初收鬧晴蜂蝶上簾鉤一院  
海棠春不管儂替花愁吟賞記前游轉眼都休風前

扶病強抬頭知道明年人在否花替儂愁集中多綿  
密悽惋之詞亦間有豪宕者踏莎行京口泊舟云白  
日西馳大江東去朝朝暮暮相逢處其旁坐老有青  
山不言不笑看今古渡口帆檣波心鐘鼓後人又逐  
前人去莫將詩句擲寒濤多情恐惹蛟龍怒

詩句有全平全仄者如玉溪韓碑詩封狼生貍貍生  
羆帝得聖相相曰度是也蘇黃諸家時時有之余見  
楹聯亦有上句全仄下句全平者如日出眾鳥繞屋

語山深幽花當門開飲酒恰好不使醉栽花初開微  
聞香皆生峭可喜

東坡大江東去一詞古今用韻者多矣茲錄其佳者  
五首宋時有無名氏云炎精中否歎人才委靡都無  
英物鏤馬長驅三犯關誰作長城堅壁萬里奔騰兩  
宮幽陷此恨何時雪草廬三顧豈無高臥英傑天意  
建我中興吾君神武卜會孫周發海岳封疆俱效順  
埃火會看消滅翠羽南巡叩闥無路徒有衝冠髮孤



忠耿耿劍鉞冷浸秋月元時薩天錫

都刺

石頭城懷

古云石頭城上望天低吳楚眼空無物指點六朝形  
勝地惟有青山如壁蔽日旌旗連雲檣櫓白骨紛如  
雪一江南北消磨多少豪傑寂寞避暑驪宮東風輦  
路芳草年年發落日無人松徑冷鬼火高低明滅歌  
舞尊前繁華鏡裡暗換青青髮傷心千古秦淮一片  
明月金時蔡伯堅

云離騷痛飲問人生佳處能

消何物江左諸人成底事空想巖巖青壁五畝蒼烟

一邱寒玉歲晚憂風雪西州涕淚至今悲感前傑我  
夢卜築蕭閒覺來巖桂十里幽香發塊壘胸中冰與  
炭一酌春風都滅勝日神交悠然得意離恨無毫髮  
古今同到永和徒記年月明時孫子虛樓云紅塵深  
處轉愁腸却憶江南景物霰飄雲開梅雨霽一片蒼  
崖翠壁竹裡鳴淙松間瀉瀑衣袂飛珠雪流觴遞詠  
山中誰是奇傑而今歸路迢迢宦途迢迢彈鋏悲歌  
發去住無憑眠未穩好夢隨生隨滅過鴈牽情吟蛩

送淚聽裡堪華髮青山不負有時還醉蘿月 本朝

尤西堂 侗 贈吳梅村先輩云江山如夢歎眼前誰是

舊京人物走馬蘭臺行樂處尙記紗籠題壁椽燭衣  
香少年情事頭白今成雪杜陵野老風流獨數詩傑  
更聽法曲淒涼四弦彈斷清淚如鉛發莫問開元天  
寶事一半曉星明滅我亦飄零十年湖海看雨絲風  
髮何時把酒浩歌同送明月

黃九烟

周星

有小半斤語序曰有某公善治生間市

肉不得踰四兩名爲小半斤人遂以小半斤呼之道  
人聞而嘆曰此盛德事也不可不傳因爲長謠恭紀  
之謠曰市肉市肉震驚神人乃公終身不飲酒窮年  
不茹葷今朝胡爲忽市肉咄咄怪事疇可比倫 一解

市肉市肉爰聚童僕左手提衡右手啟櫝有錫如金  
有錢如琛把授童僕不覺掩淚酸心 二解童僕受錢

愕眙相視長跪請命市肉甯幾童曰一斤公怒欲擣  
僕曰半斤怒猶不已童僕惶恐莫測公旨 三解匍匐

再請聽公所云徐伸四指曰小半斤小半斤者半斤之半半而又半祿已踰算

四解

僕乃前行公尾其後

側身躡足潛伏間右僕詣肉市錢付屠手屠方鼓刀公突而前曰此我之肉爾毋我腠屠曰公肉敢不腠焉一增再增肉重于權名小半斤不啻六兩公挾僕歸大喜過望

五解

肉已至家僕欲持去公曰無遽談

何容易此肉我當細區分安得倉皇暴殄等兒戲爲我呼爨婢來前此肉謹付汝汝其善煎烹一爲乾豆

薦祖考二爲賓客餉師生三爲君庖饗我口飫我腹  
吾與妻妾子女共咀嚼下及汝曹俱彭亨貓鼠不得  
竊大豕不得爭餘清滿注缶轆釜須令戛戛鳴珍重  
小半斤此肉良匪輕

六解

市肉市肉震驚神人咄咄

怪事疇可比倫我聞東海有麒麟麻姑擘脯世莫陳  
公之啖肉毋乃啖麒麟吁嗟乎小半斤

七解

我聞古

有參龍人鸞叔潛醢饗夏君公之啖肉毋乃膾龍肝

批龍鱗吁嗟乎小半斤

八解

我聞天府之內有熊蹯

豹胎猩猩唇惟辟王食羅八珍公之啖肉毋乃啖彼

熊蹯豹胎猩猩唇吁嗟乎小半斤

九解

描寫刻酷讀

之鮮有不捧腹者錢燭臣評曰昔張興一飯肉常十  
斤若惠此公便可作四十日盛饌矣然較之爛蒸去  
毛之盧丞相一食十八種之李尚書則此公不猶爲  
窮奢極欲乎

江西滕王閣同治年間重建所懸楹聯極多除從前  
名作外惟劉峴莊制軍撫江右時一聯最佳聯云興

廢總關情看落霞孤鶩秋水長天幸此地湖山無恙  
古今纔一瞬間江上才人閣中帝子比當年風景何  
如又王霞軒廉訪聯云鳴鸞晝靜畫蝶春融當年文  
采風流雨捲雲飛餘勝賞乘鶴樓高燃犀渚迥是處  
江山輝映詩成酒熟待才人亦覺工麗可喜

余于乙亥年四至江右遇滕王閣落成始獲登眺欲  
紀一詩苦無新意因思閻公愛才實有足多子安一  
序在唐人駢體中亦平平無奇且落霞孤鶩亦脫胎



於楊柳春旗耳乃作七古一章云有客倚棹遊南昌  
三度訪古悲滄桑眼前笑兀忽見此依然高閣開滕  
王昨由機船泝楊子一日千里來潯陽天時人事偶  
然耳豈必神助邀馬當偉哉東南擅名勝嵯峨傑構  
遙相望題詩黃鶴有崔灝七字壓倒李白狂岳陽作  
記念憂樂希文道德兼文章地以人傳倘舉例子安  
一序敢頡頏何況持論尙器識徐箋庾賦曷足臧乃  
知閭公實好士大會賓客華筵張一朝捧袂被容接

揚眉吐氣已激昂羣公未賦堦焚稿天才遽復廣座  
揚鍾期楊意寓景慕得一知己名益彰黃金築臺重  
聲價巍然此閣堪比量祇我登臨縱游目莫更憑弔  
搜枯腸仙人帝子不可作俯仰一世誰短長但見山  
蒼蒼今水茫茫江頭日夜風浪浪

長聯最不易作孫髯雲南大觀樓一聯久已膾炙人  
口近傳羅平竇君堦題岳陽樓聯云一樓何奇杜少  
陵五言絕唱范希文兩字關心滕子京百廢俱興呂

純陽三過必醉詩耶儒耶吏耶仙耶前不見古人使  
我愴然淚下諸君試看洞庭湖南極瀟湘揚子江北  
通巫峽巴陵山西來爽氣岳州城東道巖疆潞者流  
者峙者鎮者此中有真意問誰領曾得來硬語盤空  
起結尤超妙吾鄉何廉昉撰揚州題襟館聯云當年  
多士登龍追陪雅集溯漁洋脩禊賓谷題襟招來濟  
濟英髦翰墨壯江山之色繫玉鉤芳草綠蘸歌衫金  
帶名花香霏硯席揚華摘藻至今傳宏獎風流賢使

君提唱騷壇誰堪梅閣聯詩蕪城續賦此日有人騎  
鶴爛漫閒遊悵文選樓空蒼蘆觀圯閱盡茫茫浩劫  
園林賸瓦礫之場祇橋畔吹簫二分月古灣頭打槳  
十里春深補柳栽桑漸次復昇平景象大都會搜尋  
勝概我欲雷塘泛酒蜀井評泉組織工麗亦不覺其  
冗弱也

有某白挽聯云旣死莫傷心好料理身後事宜莫弄  
得七顛八倒再來還是我且撇下生前眷屬重去尋

三黨六親又有人自挽云百年一刹那把等閒富貴  
功名付之雲散再來成隔世是這樣夫妻兒女切莫  
雷同并題額云這回不筭亦覺趣甚

挽聯有極流麗者潘吉甫明經誦一聯云如何寸草  
不報春暉况破鏡光中孤鸞未老殘書堆裏么鳳猶  
雛哀哉奚以爲情苦月淒風九地有知應抱恨曾記  
長沙同聽夜雨溯海棠開後紈扇題詩桂子香初銅  
爐灺茗已矣而今若夢高山流水七弦無恙向誰彈

惜未詳作者姓名又一聯云秦淮水榭西子樓臺記  
當年聽雨判花偕隱已成無準夢碧浪裁箋紅牙顧  
曲悵此日夕陽芳草歸魂休住有情天皆可謂才人  
之筆

楹聯須切合其地不能移掛他處鎮江焦山聯云回  
看佛國青螺髻誤入仙人碧玉壺都門陶然亭聯云  
穿荻小車疑泛艇出林高閣當登山到此游覽方覺  
聯語之妙

潮州韓昌黎廟聯云天意起斯文不是一封書安得  
先生到此人心歸正道只須八個月至今百世師之  
吾邑張許二忠祠云孤城屹立半壁粗完自昔論勛  
儕李郭一日効忠千秋慕義此間繼起有間陳天下  
昌黎廟二忠廟多矣此則一切潮州一切江陰均移  
易他處不得

古人之詩每有所本少陵之涼風起天末君子意如  
何本於張燕公秋風樹不靜君子歎何深也入簾殘

月影高枕遠江聲本于洞房懸月影高枕聽江流也  
雖有所本而句轉勝杜與李同時其句亦有相似者  
太白云山隨平野盡江入大荒流少陵云星垂平野  
闊月湧大江流無意相合而各擅其勝



栗香隨筆卷三

江陰 金武祥 澧生

何鏡海觀察

應祺

善化人文詞卓犖才氣縱橫遇盤

錯事皆立辦無所依阿各督撫皆嚴憚而倚任之余  
客西江觀察署贛南道統江軍水師一見卽相契後  
觀察改官粵東權高廉道聞余至廣州卽詩函往來  
以近作寄示及卸篆旋省倒屣投轄過從益密旋以  
暴疾卒未竟其用論者惜之有守默齋集詩一卷文

三卷雜詠云冰輪輒碾天無痕銀河流雲如有聲何  
人手持白鸞尾繁星淨掃餘空青寒露如珠拾不起  
桐風吹作花間雨玉枕銀屏夜不眠心逐爐烟分萬  
縷馬頭殘月馬蹄霜今夜佳人怯洞房客陳對山云  
故人千里至投我數篇詩憶別干戈地重逢風雪時  
寒蟬思咽急倦鳥欲飛遲莫聽江城笛秋涼入鬢絲  
南昌雜感云沙寒水白繞重城落木蕭蕭望眼明萬  
里關河將盡歲十年笳鼓乍休兵山連吳楚開雄鎮

合將興繼比宗臣蓋余曾以先集奉贈也已卯余以  
引覲入都復應京兆試不售太史尤爲扼腕嶺南冀  
北離合不常當日談讌之歡猶覺思之不置耳

仁和蔡緯卿大令

綸書

英敏豁達有幹濟才余兩游

潮郡時大令權釐汕頭承贈五古四章其末章自述

有云上官垂青目謂我廉吏兒稅登合甫融

合甫融卽阿笑

蓉見南埜

檄我完度支金錢權百萬漏卮嚴毫釐

自捧

草堂筆記  
檄以來洋藥釐

已收至百餘萬  
豈效桑孔術竭吾民膏脂緣此毒人

物禁則受彼欺惟期十倍征使貴如鼎彝富者乃得  
嘗貧者苦無資不禁而自禁是爲妙轉移近左侯相  
果有加徵洋藥稅釐之奏卽此意也庚辰孟秋卒於  
羊城年甫逾強仕余輓以聯云夜雨話巴山落知  
交心醉屢從公瑾飲秋風吹大海茫茫天道時艱同  
惜賈生才

緯卿出贈其曾祖嵩霞方伯家訓及其祖父小霞制  
軍涼州賸草五古云青山不待招開軒入我屋七古

題移居圖云寸田尺宅不治生又借丹青闢堂廡題  
姜廉使冬夜課孫圖云遺子簫金更何有不知子復  
遺孫否阿翁破笥出蟲魚奕葉縱橫常不朽五律喜  
靜岩少寇暫留云別情濃似酒詩味淡如秋題福觀  
察青海從戎圖云河湟臨遠塞風雪近殘年七律寄  
內云負卿別後花盈座遲我歸來月滿軒寄吳藥房  
教授云幽吟只合酬黃菊豪飲無妨醉碧荷緯卿又  
贈其尊公磨洲廉訪瑤華仙館試帖蓋古近體經變

不存僅留試帖一卷皆少年與館閣諸公分題賦詠  
者咀華含英無美不備摘錄二首以當一嚮之嘗李  
都尉重陽日得蘇屬國書云又是重陽候邊城悵索  
居三秋降將淚萬里故人書漢節凋都盡胡笳慘不  
舒歸心隨一雁搔首對雙魚記得看羊日悲深牧馬  
餘插萸同感惻折柳重欷歔冠劍年非昔刀環夢已  
虛涼宵還作答風雨滿穹廬國于蝸之角云莫謂廬  
其角蘧廬且結蝸我疆原有截此國異無懷布指圍

能徧鉤心闔欲偕篆難飛檄蝕涎帶戰塵揩地儼  
叢闕圖還蟻陣排援軍誰倚鹿按部待鳴蛙樂豈盤  
中適觀應壁上皆宸垣鰲極建干舞頌堯階緯  
卿自著有天風環珮室詩稿其哲嗣當能刊行之

錢塘陳子厚太守

坤

惆悵無華老於吏事所著有粵

東防勦紀略鱷渚迴瀾記治潮芻言蓋居粵最久言  
粵事最詳其羊城竹枝詞徵引繁博有關勸懲又有  
如不及齋詩鈔抵官沙瑯云要知醅樸處端賴長官

清北行道中有感云忍把金錢爭買笑飢寒多少路  
旁人可想其性情之敦厚矣

子厚有小像手持酒杯其配碧纓內史冒夫人題詩  
云三十年來海上行風濤隨處片帆輕琴心劍膽俱  
無用不及醅醕老此生縱然投筆志難酬博得虛名  
作醉侯春滿陌頭看柳色登樓無悔亦無愁其次女  
靜漪適王氏能詩早卒有寒碧軒詩存

策安太守名貴全蒙古蘇穆察氏丁卯舉人由京秩



改官於外需次粵東居訶林之前房櫳雅潔有花木  
之勝工繪事兼能詩登漱珠橋醉月樓贈主人云不  
是仙人也好樓漱珠橋畔小勾留  
牕臨碧海供遐矚  
門對青山可臥游  
四壁笙簫花似錦  
一簾風露月如秋  
幽居到此真清福  
頃刻銷除萬斛愁  
嘗繪荷亭銷  
夏圖徵詩余題云荷花世界柳絲鄉  
用成句  
城市園林  
趣更長  
著個扁舟小  
于葉朝朝划到水中央  
水雲深處畫圖開  
雅集何嫌數舉杯  
我與閒鷗同不速  
可容

日日看花來

江南庚午科首題周公謂魯公曰一節子塲作側重  
親親思以偏師勝薦而未售房考張晴江先生

清華

謂予曰主司因究係偏鋒未便多取已先得此格一  
卷置前列矣卽第十四名陳君兆熙也號耘蔡本金  
陵名下士後以知縣發廣東余續編金氏文牘皆乞  
君校正之又爲題拙著試帖詩有云傳家有絕學貽  
謀遠且臧譬之水成淵自有蛟龍藏又云旣工五七

言試律尤兼長爛如五雜組柔如百鍊剛精思入微  
妙餘韻仍悠揚唐賢重斯體沈宋相頡頏耘蔡古文  
駢體皆工制藝特其餘事也

余以所居大岸因自號一斥山人蓋拆大岸二字爲

四字也後知仁和繆蓮仙

良

亦有此號惟斥作厂斥

與厂本均同岸蓮仙作記取義於一並引說文釋厂  
字云山石之厓巖人可居其所輯文章游戲中卽載  
此篇梁晉竹兩般秋雨庵稱其下第詩云妻子望他

龍虎曰功名于我馬牛風句極工趣

昌黎詩云婆娑海水南簾弄明月珠故余游粵後題  
齋額曰弄珠吟館會城之南有海珠石相傳賈胡持  
摩尼珠至此珠飛入水夜輒有光怪故海曰珠海江  
曰珠江浦曰沈珠其石則曰海珠云嶺南在古時凡  
生男子多命曰珠兒生女多曰珠娘珠娘之可知者  
交趾王之女曰媚珠雙角山之女曰綠珠是也屈翁  
山云珠者粵之精華月之所生日之所養以爲士女

之光耀故凡還珠之郡媚珠之都禺珠之鄉珠厓之國生其地者人多秀麗而文皆珠胎之所孕育者也此珠之所以可貴也夫

中國種痘始于宋眞宗朝近時各省盛行西洋牛痘按古針刺法以極薄小刀微剔兒兩臂消爍清冷淵二穴以他兒痘漿點入或三兩處四五處越七八日卽見點比時行之痘大兩倍兒無所苦嬉戲如常最稱簡便牛痘新書云痘何以云牛也痘之種自牛來

也海外向無痘症嘉慶元年西洋天行大盛紛紛傳染惟一鄉見牛之乳頭乳旁有小藍泡形如痘樣以沾小兒臂上各出數顆毫無所苦後遂不染天行之痘時有醫生咕嗆者往察得實遂以其法傳之啞啖喇啞等國呂宋國王聞之特發萬金造船載嬰兒傳種而去無不應驗俱能免害嘉慶十年傳種至澳門而中國始有牛痘云

近傳滇南有一人無子祀呂祖甚虔一日有道人造

門囑于臥床後柱上寫三更露結桃花實二月春生  
燕子窠十四字書時默誦无思也无爲也寂然不動  
感而遂通四句誦七遍勿令人知其人遵行果舉一  
子傳之于人多驗

廣東木棉花可解鴉片烟及諸毒凡吞生烟者用木  
棉花六錢燒灰加食鹽二錢將滾水攪勻冲服兩刻  
之久即可吐出吞烟多者卽多服兩副至三副無不  
愈者凡解水粉鉛粉砒霜蟲毒野菰諸毒但用木棉

東坡全集卷三  
花燒灰冲滾水服之不可用鹽切戒以蘆花冒充燒  
時慎勿吹耗服之尤宜淨盡方見功效

木棉高十餘丈大數抱枝柯一一對出排空攬拏勢  
如龍奮正月發蕾似辛夷而厚作深紅金紅二色蕊  
純黃六瓣望之如億萬華燈燒空盡赤屈翁山詩云  
十丈珊瑚是木棉花開紅比朝霞鮮此詠花也子大  
如檳榔五六月熟角裂中有棉飛空如雪王漁洋詩  
云斜日紅棉作絮飛此詠棉也順德張藥房太史

錦



芳有滿江紅詞二首咏木棉花云十丈晴紅高照徹  
尉佗城郭濃綠外數株烘染驛樓江閣一簇晴霞標  
乍起九枝海日光齊躍似炎官火繖殿前張飄丹壑  
龍銜燭行寥廓鵲啼血巢跼萼經百花飛盡東風猶  
惡歌舞同鋪雲錦亂扶胥潮動珊瑚落縱吹殘尚得  
一回看翻階藥卷盡殘紅又看到吐棉晴郭風乍起  
含苞初拆半飛還落高逐雲英輕作片暗隨柳絮低  
穿幙似少年霜鬢換朱顏青春昨茅花被眠溪閣蘆

花褥堆漁船問團團收得可勝衣著莫遣狂飈吹歷  
亂江東賈客裘逾薄待裝成襖子盡奇溫黃棉若此  
上首詠花下首詠棉也嶺南自春仲至孟夏無處不  
開洵天下之麗景樹易長其材不可用故少斧斤之  
傷乃其花之有用如此尤可寶貴矣

廣州學使署東偏環碧園爲南漢藥洲故址有九曜  
石誌稱劉龔移自太湖靈壁浮海而至者石凡九高  
八九尺或丈餘崕兀璦璦上多宋人銘刻吳子實侍

講在任時曾往遊讌因得審視焉其幕客袁渭漁明

經寶璜

博雅好古搨以贈余並媵以七古有祇從嗜

古盟幽歡網羅散佚珍琅玕之句余和原韻贈詩云  
九曜有石遺何年摩挲更得閱古樂滄桑蕪沒題識  
湮還欲從君證參錯皆詠此石也

英石產粵之英德縣生山谷間大小相疊一一嵌空  
門竦具峯巒巖洞之狀辛巳余携十餘石歸因購礬  
石盆之長者分置之參差相配雜蒔文竹虎刺及花

木之小者葱蒨瓊瓏頗饒幽趣竟日玩視如游畫圖  
一夕夢入其中題其岩曰獅林一角後有絕句一首  
比醒則僅記四字而已

英石外又有石曰蠟石黃潤如玉透鏤者難得產從  
化清遠永安恩平諸溪澗多在水底又有鑿取巖中  
玉乳置水木間其色白是曰山芽可與英石間列而  
以蠟石平鋪其下爲陂陀起伏之形屈翁山云高者  
爲羣玉之山卑者爲黃金之谷翠屏丹嶂掩映如霞

雖炎洲多奇山水而恆以此爲絕勝云

連平顏夏廷觀察

培瑚

以翰林官江蘇常鎮道余丙

子游粵觀察已引退家居主講會城應元書院晤談者屢矣見贈其所刊怡怡齋試帖後出示其詩稿僅記其過高唐州有感云策馬平原上高唐落日過城荒人跡少野哭鬼聲多遣將勞宸算殲渠速凱歌不堪烽火警南望倚干戈

番禺陳古樵大令

璞

曾任江西安福縣善畫工詩余

同郡吳魯庵大令與同年交好曾乞其畫山水見贈  
并題句云萬疊峯巒積翠浮白雲深處亂泉流山腰  
忽見盤蛇路知有茅庵在上頭

番禺許涑文觀察

其光

原籍杭州以第二人及第官

廣西左江道假歸羊城曾與晤談洎余己卯入都道  
經津門時觀察在李揆帥幕中奏調直隸函邀少留  
匆匆未暇也猶記其見示重至杭州書感云卅年三  
到故鄉來無恙松楸話劫灰如許頭顱添白髮往時

池館賸蒼苔條冰宦改仍儒素載石裝輕愧吏才行  
過半山增感慨桃花零落菜花開讀之情韻兼至又  
云運去騎驢終偃蹇時來立馬便英雄又有慨乎言  
之

吳川李小巖孝廉

文泰

海山詩屋詩話云緬茄出緬

甸中國惟高州西岸一本明太僕李公邦直自雲南  
携兩枚歸植其一不萌其一偶墮楊下疑婢竊撻之  
遽自經楊下忽萌芽甚鉅因毀屋出之卽此本也今

蔭畝餘樹側卽鍾硯雲家故贈硯雲詩云去年三月  
訪君家屐齒行經石徑斜認得故人門巷近春風吹  
落緬茄花樹近歸闕姓爲世業其實可治目疾且較  
緬產差鉅乃屢種不萌殊不可解

廣州城西花田多種素馨一名那悉茗志稱陸大夫  
得種自西域南中行紀云南越百花無香惟素馨香  
特酷烈南漢美人喜簪此花死後遂遍栽冢上故曰  
素馨斜余泛舟花田詩曰依稀故苑想昌華何處遺



香認館娃弔古尋芳無限感不堪行到素馨斜探素  
馨者率昧爽往以天未明見花而不見葉其稍白者  
則是其日當開者也其質以升斗計若量珠然花宜  
夜上人頭髮乃開見月而益光艷得人氣而益馥寬  
夕氤氲故王漁洋廣州竹枝詞云鬟雲盤髻簇宮鴉  
一線紅潮枕畔斜夜半髮香人夢醒銀絲開遍素馨  
花屈翁山云素馨貴而茉莉賤故南滙吳泉之  
省蘭  
十國宮詞云名花美女正相當一例呼來共色香絲

縷細盤雲鬢驪還應壓倒小南強昔南漢遣北使以茉莉文其名曰小南強見清異錄

荔枝荔字從艹從荔不從荔音離割也荔音協同力也荔字固當從荔本草謂荔枝木堅子熟時須刀割乃下南方離火之所出荔枝得離火多故又名離支亦曰丽支丽離也以臘而萼以春而花夏至而子赤增城沙貝所產爲最其名數十種掛綠爲上品桂味糯米糍次之狀元紅則賤于荔枝矣昔何子貞太

史兩至廣州以未食荔枝爲憾其題潘氏荔香園詩  
云無奈荔枝何昔我來遲今太早又搖蘇軾去主人  
不飲客常醺余以丙子五月至廣州適有日啖三百  
之樂故卽事詩云五千里外涉重洋蛋雨蠻烟感異  
鄉一事思量堪一笑我來剛及荔枝香

吳中人需次粵東者以嚴蘭史太守

家疇

爲最久太

守爲吾吳舊族三世皆以詞林起家故文酒風流無  
俗吏態近刊其蘭言館試帖余爲序之有多少六朝

興廢事題云古來多少事興廢話漁樵陳蹟留千載  
繁華感六朝江山空半壁燈火又連宵玉樹新歌起  
瓊花舊恨銷揚州三月夢隋苑一枝簫金粉餘名勝  
樓臺破寂寥錦帆桃葉渡鐵鎖秣陵潮無限登臨慨  
間吟付畫橈沈雄跌宕方之有正味齋不多讓也

彭南屏太守

翰孫

美丰儀豪于詩酒遇繁劇事能從

容應之已卯卸廣州篆卽歸省寄示留別詩有壓裝  
萬卷亦驚人之句余和其原韻寄懷云鷗盟笠澤遲

前約蝶夢羅浮證夙因何日雙旌重莅止與君同醉  
嶺南春今聞其念切循陔返粵尙無時日也

山陰汪芙生司馬

琅

學問淹雅尤工詩詞余屢于友

人處與之晤談曾見其春游絕句云酒旗風裏暖猶  
輕桐帽櫻鞋自在行今日斜陽前日雨木棉紅出越  
王城春詞云輕寒如水逼熏籠破曉猶吹料峭風覺  
道夜來微有雨桃花紅入小樓中今夏乞其畫扇爲  
書舊作長短句虞美人云鶯聲勸我尋春好將近春

分了便隨芳草到城東却又春烟漠漠雨濛濛分明  
雁字橋邊路是我曾游處重來不見小桃花何況小  
桃花下那人家賣花聲云何處賣餠簫過了花朝紗  
窗閒聽雨瀟瀟不爲花愁兼酒病祇是無聊待把水  
沈燒紅袖人遙題詩帕子舊生綃小半墨痕多半淚  
一半香銷

陳訥人副郎

光照

元和人老于幕府自言少年時襍

被游粵習申韓家言十年勤苦始獲有成蓋天下事

其始末有不由于勤苦者也常招集城西華林寺談  
讌猶豪戊寅年卒已七十餘矣余輓以聯云蓮幕緬  
長才回思七十年來能使公卿爭倒屣華林尋勝蹟  
相聚五千里外難忘朋舊共開樽

訥人曾持贈其尊公畏三學博本直覆瓿詩集貧士  
行贈龔生云農夫爲苦饑胼胝作稼穡紅女爲苦寒  
辛勤事紡績吁嗟白屋士何獨終年嘆嘆復喑喑寒  
不可以衣饑不可以食塵生釜甑裋褐敝出門黯澹

無顏色自矜學得文章成行將芥取功與名不知此  
身乃大誤好官幾輩由窮經長安道上車如水丞相  
門前客如市胡不去習計然筴券名絕勝毛錐子不  
爾亦當走四方黃皮作袴鐵裯褱短刀匹馬向絕域  
功成衣錦還家鄉殘編齷齪苦相守何時真取印如  
斗呼之牛馬誠可辱詈以豎儒亦堪醜僕惟生平傲  
骨多儒冠業已成蹉跎當前有酒且共醉若爲吾舞  
吾爲歌歌成有淚如鉛瀉曩言非激亦非假卽看膏



梁文繡人豈盡鋤田飼蠶者

余姑母適繆氏未嫁守貞歸事余 祖父母癸亥年  
祖母棄養遂以痛母卒于喪次 家君撰貞孝事略  
徵詩汪芙生題七古起四句云瑤箏絃折雌鸞孤返  
哺還作南山鳥貞筠冷抱湘烟綠卅載斑枯殉慈竹  
凝鍊工秀在長吉玉溪之間陳耘蔡用長慶體其敘  
嗣子嗣孫皆歿復議兼祧中四句云回首前塵最愴  
神零丁兩世未亡人優曇花發原難久常棣枝多或

議分中幅提頓情韻兼深周積甫敘殉孝後四句云  
吾夫有後女事畢吾親已亡女心絕偷生忍死待今  
日卅三年前心早決筆力堅卓能道出貞孝心事其  
餘佳篇甚多不能備錄

積甫名福昌錢塘人由部曹改官粵東縣令其留別  
都門諸君子詩第二首云解囊分贈辦裝錢排日爭  
開祖餞筵饑迫未容成宦隱醒狂應共憶詩顛蕭條  
行李臨官道烽火餘生感少年手版隨身蠅字細英

雄末路最堪憐又云閒雲出岫違初志旅雁移巢戀  
故枝風翻別調難成曲花爲移根或早開皆跌宕自  
喜詩如其人

錫山自雲林後以畫名世者代有數人近時則以秦

氏昆仲爲巨擘誼亭農部

炳文

書畫旣爲世所寶貴

甲戌歿于津門余未及見逸芬齋尹

祖永

與農部爲

羣從兄弟亦工六法名與相埒皆辦香烟客麓臺箸  
有桐陰論畫及畫學心印兩書尤見採摭之富評論

之精丙子歲余與晤于羊城交久益契自巨幘以至  
尺幅有求輒應且言爲君作畫輒生歡喜心蓋夙有  
翰墨緣也見示桐陰詩草題畫絕句云濕翠如烟雨  
後山長松落落水潺潺草堂瀟灑琴書淨只有倪迂  
合往還竹光雲影樹參差隔浦漁人理釣絲池畔荷  
香新雨過滿亭蒼翠夕陽時又云生面重開筆獨超  
古人窠臼已全消此則自道其所得矣

逸芬有猶子子儀茂才

鳳噪

爲貧而仕屈于簿尉其

畫法一本家學嘗爲余臨石谷冊頁十二幀見者以爲酷似大阮也有題畫詩云築得茆齋夏亦寒小橋流水竹千竿幾生脩到清閒福長與琴書結古歡亦有清逸之致

張壯武公

國樑

廣東高要人少爲大俠粵亂全家陷

賊中後卽自拔來歸屢立大功所向披靡保衛蘇常全東南財賦上命圖形以進嘗具摺請安奉有卿安卽朕安之諭庚申之變餉絕援窮戰死于丹

陽之十里牌蔣叔起廉訪庚申偶作云張邵雄無敵  
歸朝屢立功威名諸將右辛苦大江東一死完臣節  
平生有士風丹陽諸父老流涕話黃驄吳晉王太守  
哀江南三十首之一云遐邇傳聞涕泗同大星飛落  
曲阿東九重痛惜長城壞一柱傾頽大局空野戰岳  
飛當勁敵絕援楊業抱孤忠沈沙折戟懷遺烈十里  
牌前弔晚風張公歿而蘇常盡陷東南糜爛矣可勝  
歎哉

哀江南第二十九首云淚落新亭滿酒觴陸沈餘恨

感茫茫表忠未見崇高觀斬佞何由請上方

時總統張弼

未卹江督何

尚未就逮 珠玉空江聞鬼哭關河落日黯神傷可

憐草長鶯飛地盡作西風古戰場咏何督棄城士民  
攀留者被擊傷云擁留父老方攀轂跋扈公徒竟倒  
戈咏某紳出走爲仇家所殺云道路有人歌蠆尾死  
生何事付鴻毛皆佳

無錫鄒鍾泉先生

鳴鶴

由進士出宰中州薦擢廣西

巡撫清風亮節名重一時癸丑粵逆陷金陵先生死

之 賜諡壯節哲嗣和之太守

觀泉

出贈壯節所撰

道齊正軌及制藝又寶素齋詩鈔則亡逸而存不及  
半矣出都留別云捧檄稍舒慈母望鳴絃竊慕古人  
風送丁暢之云過眼雲山供放筆關心風雨付銜杯  
過阜城爲先君攝篆地云貧宦能爲兒輩地遺黎應  
識宰官賢題侯衛公負薪圖云移孝作忠君記取萬  
家烟火一肩擔數聯和平忠厚不愧有德之言又界



河驛咏古云吾道難行吾說存今世不治萬世治是其學道經世之志又常于詩發之

蒙古良峯相國

倭仁

諡文端爲近時理學名臣篤守

程朱之學有日記數卷皆自抒心得身體力行奏疏

中如請進日講脩實政崇節儉諸篇皆剴切敷陳有

古大臣風度哲嗣錫亭司馬

福綸

官于粵見贈倭文

端公遺書所存詩過樣子嶺云流水送行客寒山厯

萬重半空盤鳥道一徑入雲峯皓皓摩天雪

摩天嶺在樣子

嶺東蒼蒼拔地松紅塵真遠隔我欲訪仙踪聞喜道中

遇雨云策馬入烟村蒼茫雨氣昏生機蘇草夢涼意

醒詩魂雲擁條山遠波添重澤渾英賢懷往昔城南為裴

趙故里名把酒細評論格律高渾雅近唐賢其他佳

句五言如荒原衰草白野火晚山紅戴星勤鞅掌踏

雪走輪蹄落霞隨日盡飛鳥入烟冥七言如東去江

流千頃碧西來山擁四圍青不寒不暖二三月宜畫

宜詩遠近山皆工穩清麗集中無五七古統計所存

本不及一卷也

堂姑丈無錫杜少京先生

紹祁

由庚辰進士出宰閩

中升淡水同知其任鳳山縣時疊次勦平土匪倡捐  
重建舊城後以親老告歸有自輓聯云電光石火小  
功名十載臨民頗異風塵俗吏鼂背鯢身大遊覽半  
屏殺賊居然戎馬書生箸述甚夥經燹不存外兄文  
山茂才先生次子也久困塲屋丁卯秋試猶與晤于  
風簷中身後零章斷句僅有存者題龔寅谷梁溪返

棹圖云三篙滑笏波紋綠瓜皮艇子清溪曲飛絮因  
風宛轉颺落花如雨參差續亭亭九峯削青玉蒼翠  
空濛看不足立候傾欹俯碧流浮圖突兀撐紅旭渲  
染烟雲歸尺幅江鄉景物縈心目故園已是莽榛蕪  
秀嶂依然妙林麓我亦飄零書劍身君爲五斗折腰  
人從頭却話家山舊過眼空憐嶺嶠春一甌香啜蠻  
中茗千里羹思吳下蒠何當共泛蓉湖櫂芳草垂楊  
與問津其他如越女攤錢輸白鴿村巫疊鼓賽青蛙

守拙久航中散懶安貧誰解子雲嘲皆可誦也哲嗣子撫表阮抱殘守缺勤學勵行丙子舉于鄉辛巳叙于羊城相與追話先緒欬歔久之子撫昆仲均有文譽仰承家學騰達有時余拭目俟之矣

余初至粵卽接高州何鏡海觀察書云近有布衣于晦若者年未二十胸羅全史僕所刮目祇此一人後余于朋好處多稔其才久未之見也已卯晦若由國學生舉廣西鄉試庚辰聯捷成進士選庶吉士才名

噪都下辛巳余三至粵遂獲晤談調饑始慰鏡海先  
曾寄示除夕感懷律詩三十首並附示晦若和作記  
其警句云著述幾家生面少文章從古稱心難世事  
江河真日下人才門戶各風生蒼狗浮雲多變態黃  
雞白日暗傷神英雄自古無成局富貴何時是故鄉  
執干且對刑天舞拔劍休爲斫地歌彈指華年驚露  
電從頭昨夜憶星辰有態笑顰供刻畫無聊歌哭寄  
文詞皆慷慨激昂饒有寄托晦若名式枚廣西賀縣

人原籍四川營山縣

江都張丹叔都轉

聯桂

由太常禮官出爲粵西同知

旋擢知府所至有政聲丁憂服闋改官粵東高州守  
調潮州其權惠州時曾以東坡像及石刻蘇詩見惠  
並附以所著問心齋學治雜錄皆在粵西時稟牘判  
示也又有延秋吟館詩鈔二卷送郭柘農司馬還鄉  
云同作炎荒客君歸我未歸虛名澹秋影薄祿報春  
暉意逐風帆遠心隨月鏡飛烟波江浩渺到日蟹初

肥登全州城樓云龍蟠虎踞此巖疆白草黃沙舊戰  
場嶺勢千重分楚粵江流一綫下沅湘北門鎖鑰今  
誰掌東道舟車笑客忙更上危樓窮遠目不知何處  
是吾鄉七夕絕句云洞裏仙人方七日千年已過幾  
多時若將此意窺牛女天上曾無片刻離其他五言  
如風霜新白髮兵火舊青山世路憐余拙交情愛汝  
真七言如但將民事如家事孰謂今人遜古人事非  
當局難誰解人到中年感易生淚如秋雨絲絲密愁



似春潮夜夜生古體有句云任大責必重利害形影  
隨素餐固可恥債事尤足譏又云讀書貴得閒觀人  
當于微心平論自定豈爲人言移此數語可徵才識  
余去歲捧檄清遠峽口與飛來寺相近久未留題殊  
愧塵俗靜山太守見示詩稿有過飛來寺詩云山僧  
渾不識何處問飛來古寺巒擁塵寰佛界開白雲  
時往復孤客獨徘徊好句吟難就登臨愧不才葢途  
中所經猶寄情吟詠如此靜山名定安乙卯舉人爲

鼎臣將軍銘安之兄由吉林迴避改省廣東至粵後  
已得詩盈帙矣

洋務始于粵中外交涉事亦最多地方官辦理得宜  
爲夷人所畏服者以漢軍王向亭太守五福稱最哲  
嗣玉仲司馬

蘊璫

繼仕于粵篤好風雅余游粵不及

見太守時與玉仲爲文酒之讌出示其多古意齋詩  
草春江曲云春風吹我江上行春雨不斷春水生春  
雲漠漠弄春色映出陌頭春草碧春江女兒嬌如花

生小江上船爲家郎來喚渡儂打漿告郎此際春潮  
長古意云春色上高樓春江不斷流美人明月夜獨  
客木蘭舟瑤瑟動清怨鑪香生古愁誰能折楊柳慙  
悴此江頭新會雜詩云秋氣漸蕭瑟秋懷入渺冥西  
風吹落葉一夕滿空庭涉世頭先白逢人眼不青羈  
人無可訴聊與考圖經夢伯眉云來是何時去幾時  
茫茫踪跡費尋思歌離弔夢都無賴成佛升天總可  
疑地下幾人堪共語夜來見我尙論詩料應難訂重

逢約起坐疏窗雨似絲榕西小築云石徑紆餘任意  
行牽牛裊裊上茅亭豆棚低亞竹籬短時露幽花一  
朶青看月同韻卿作云輕寒天氣露如珠信步庭階  
興不孤一院花香人並坐月華涼到碧紗櫺蓋其夫  
人字韻卿亦能詩有春閨思云昨夜東風好春深道  
韞家憑欄無一語紅遍小桃花附錄稿中僅此一首  
夫婦能詩者又有南城劉滌霞別駕鼎滌霞先隨其  
尊人聘齋太守宦粵娶于許氏字鏡芙番禺許星台

廉訪長女也滌霞題余入粵後弄珠吟稿有羅浮峽  
蝶酣仙夢渤解魚龍聽好詩之句見示詩草秋齋月  
夜云雲破月乃出紙窗忽開朗空階闌無人與到每  
獨往遙天一鶴飛晏然振高響良宵殊妙歡相對影  
成兩目送南征鴻尺書結懷想金盤灘云波湧吼長  
鯨風高萬壑鳴江河喧地籟猿鳥變秋聲夢短烟光  
合詩寒夜氣清吟成老蛟泣山雨逼燈青詠南宋云  
北狩當時說兩宮刀環空復怨西風曾聞璽綬傳靈

武不見旌旗出漢中雪窖何年祇有乳渡江幾日馬  
成龍誰知趙氏中興業還藉錢家納土功公子云游  
絲輕拂碧油幢夾道芳塵十里香高柳綠分盤馬路  
野花紅入鬥鷄坊閒招燕市吹簫客還訪邯鄲挾瑟  
倡宿酒未醒愁未散醉餘扶上打球塲其夫人有漁  
兒曲云長夏江鄉畫不如柳陰疏處女郎居夕陽欲  
墮月初上釣起一雙紅鯉魚其稿中多填詞尤工小  
令云

楊晴帆刺史有詩名余未閱其詩稿也于他處見其  
斷句云野花時一落山禽暝自還曇花淡無語野林  
渾欲秋小橋流水碧三尺隔嶺霽霞紅一城百尺未  
降湖海氣一杯同破古今愁皆佳晴帆名炳勳福建  
南平人有幼子甫十齡十三經已畢讀余面試之均  
能背誦可喜也

仁和王子展別駕

存善

博聞強識文詞敏贍嘗出示

其題王漁洋畫像絕句云麟角牛毛冠一時生平風

義友兼師知交容易傷零落珍重親編感舊詩又題  
朱竹垞烟雨歸耕圖絕句云買田陽羨憶髯蘇好帶  
溪山入畫圖恰是權歌聲未了一犁烟雨夢鴛湖皆  
綽有神韻

廣東撫署花廳聯云花竹一庭是亦中人十家產軒  
窗四壁可無廣廈萬間心臬署有督審局余爲逸亭  
兄題聯云體天子好生之心有冤必雪師聖人無訟  
之訓欲善從風又爲題積案局聯云清訟以恤民凜



官箴先論功過安良須戢暴持成憲貴協寬嚴

秦澗泉學士自題瞻園聯云辛勤有此廬拙身歸矣  
喜鳥啼花笑三徑常開好領取竹簟清風蒨檐暖日  
蕭閒無箇事閉戶悠然對茶熟香溫一編獨抱最難  
忘別來舊雨經過名山余壬戌歲至泰州游氏園見  
主人自題聯云十畝地無多只合春酒留賓秋燈課  
子半生天已定且向西園學圃東郭催耕二聯閒適  
之趣讀之神往可當一首招隱篇也